

Riunyumj Sawj Saedcej Engq Gyaunde

Dwg gijmaz sawj saedcej bienq ndaej engq gyaunde, gou siengj moix boux vunz gamjsouh cungj mbouj doxdoengz, gou dwg nyinhnaeuz riunyumj sawj saedcej bienq ndaej engq gyaunde.

Ngoenzde, bonjlaiz simcingz gou gig ndei, cix sawqmwh deng mbaw sigienj he yingyangj daengz simcingz gou, yawj faensoq gwnz sigienj, simcingz gou sikhaek nyapnyuk raixcaix. Vunz gangj hux mbouj yiengh dog, bonjlaiz banhaet mbwn gvengqyauyau, daengz banringz le gingqyienz gwnzmbwn fwj ndaem-ndatndat, gou yawj youq ndaw da gip youq ndaw sim. Daengz mwh cuengqhag gaeng doek fwn iq lo. Fwn iq doek youq gwnz ndang gou, gyauej gou hix ngaem ndaej yied daeuj yied daemq. Fwn doek hung lo, lij yied daeuj yied hung, couh youq mwhde, gou fwt raen miz aen bouqgaihuq he, ndawsim gou baez angq, sam yamq gyoeb guh song yamq buet haeuj

bouqgaihuq bae.

Ndwn youq bakdou, yawj baihrog fwn yied doek yied hung, sim gou lumj miz gijmaz doxgaiq dimz nei, naekgywdgywd. Cingq youq mwh gou siengj buet haeuj gyang fwn bae, sing haidou he sawj gou dingz roengzdaej. Dwg dahcej soungaenz, de riunyumj sing iq cam gou fatseng gijmaz saeh ha, hoeng gou cix mbouj swt de, simcingz engqgya nyap lo. De dauq haeuj ndaw bouq bae, gvaq yaep ndeu de ndenq hawj gou aen liengjva gyaunde he le, youh riunyumj naeuz: “Mboujguenj bungzdaengz gijmaz dwgrengz, cungj yaek baujcz najriu o.” Gou gyaengj mbat he, cij singj gvaqdaej ngaek gyauej gyo’mbaiq de, liuxle baenq ndang buet haeuj gyang fwn bae.

Ma daengz bakdou ranz gou, naj gou youh saepsaeng lo, gauj ndaej baenzneix ca, aiq ndaej deng daxmeh ndaq bw. Itmienh siengj dwk itmienh hai dou haeuj ranz. Daxmeh raen gou

najsaep najmij, couh naeuz: “Dwg mbouj dwg gaujsi gauj ndaej mbouj ndei ha? Mbouj youqgaenj law, dawz daeuj hawj gou yawjyawj.” Gou mbouj cingznyieng dawz gaujgienj okdaeuj, bonjlaiz siengj cunjbei deng daxmeh ndaq, hoeng daxmeh cix lumhlumh aen gyauej gou, riunyumj doiq gou naeuz: “Mbouj youqgaenj law, baez-laeng gauj ndei couh ndaej lo.” Gou youh gyaengj mbat he, roxnyinh ndawsim raeujrubrub.

Ngoenz daihngaih daeujdaengz hagdangz, lauxsae heuh gou bae bangunhsiz de, gou youh nyuq aen najbyak, gamjdaengz lauxsae yaek miq gou, hoeng lauxsae cix riunyumj gujli gou, vix ok yienzaen loek hawj gou. Sim gou lumj deng doiq fwnz raeujrub he lumh gvaq nei, daengx ndang raeujrubrub. Gvaqlaeng, mboujlwnh gou bungzdaengz gijmaz dwgrengz, gou mbouj caiq doeknaiq, gou dwg riunyumj mienhdoiq de.

Gijmaz sawj saedcej bienq ndaej



engq gyaunde, dwg riunyumj, dwg de gujli gou, cihciz gou. De lumj rumzcin daeuj vaiqviet, bae hix vaiqviet; hoeng de youh lumj ndaundeiq gwnzmbwn ronghmyag lwenqda, hawj saedcej miz maqmuengh lailai.

(haj nienzgaep Mauz Yizvwnz)

Buhvaq

“Meh ha, gou swiq-ndang ndei lo.”

“Daenj buhvaq riuz di vei!”

“Gou mbouj daenj go.”

“Dingqvah vei!”

“Mbouj daenj go, meh ha, mbwn oemndat baenzneix, mbouj daenj buhvaq couh soeng dangqmaz, liengz dangq-maz bae.”

“Mbouj daenj buhvaq, mbouj launyaenq ga?”

“Gou swiqndang ndei le, ndang cungj seuqsat liux, miz gijmaz launyaenq ne?”

“Dwgcaengz lai, daenj riuz di vei.”

“Miz gijmaz dwgcaengz ne? Meh ha, langhnaeuz gwnz ndang heiz lai, haeu lai, hoeng cix daenj buhvaq gyaunde dangqmaz, yienghneix cij dwgcaengz bw!”

(Daj 《Bonjsei Sim Lwngnyez》 (Veiz Gizlinz raiz) senj okdaeuj, Lwgfwnzme/卢奋长 hoiz)



Fwnraq

Daengx mbwn fwjndaem, ndaem-ndwtndwt at roengzdaej. Mbawfaex gwnz faex dinghcub, duzroeg hix mbouj ok sing, bya ndaw raemx mbouj raen lo…… Sawqmwh, raq rumz hung he bongjhuhu, bongj dwk ngafaex bibuengq ngwdngwd, hwk dwk duzroeg hemqcica.

Mbat byajmig he lumj hojcen nei veh gvaq gyangmbwn, yied daeuj yied rongh. Humhumhum, byajraez lo, lumj miz cienfanvunz roq gyong, yied daeuj yied yiengj.

Sawqmwh, fafafa, fwn lumj naedcaw hung lumj naedduh nei daj gwnzmbwn doek roengzdaej. Fwn yied doek yied hung, yawj coh rog cueng, gofaex, duzroeg, diuzdah, cungj yawj mbouj raen lo.

Menhmenh dwk, menhmenh dwk, sing rumz iq lo, sing byajraez iq lo, sing fwn hix iq lo.

Mbwn ronghsag lo. Hai aendou, ndonj gvaq aen cueng, hoengheiq singjsien coemj

haeuj naj daeuj.

Fwnraq dingz lo, doengngoengz okdaeuj lo. Duzdoengz ndeiawj he venj youq gwnzmbwn. Lumj aen giuz iq vangungj he.

Mbawfaex gwn imq lo, duzroeg angqfaengz lo, raemx ndaw dah rim lo, duzbya youh angqfwnqfwng youz bae youz dauq lo.

(ngeih nienzgaep Vuz Yijgyah)



Bang Daegnuengx Swiqndang

Gou miz daegnuengx cabheiq youh coengmingz he. Aenvih gou dwg daeggo, mwh daxboh daxmeh nyaengq, daegnuengx couh youz gou daeuj ciuqgoq lo.

Miz haemh ndeu, daxboh daxmeh miz saeh mbouj ndaej hoengq, heuh gou bang daegnuengx swiqndang. Ngamq roengz raemx bae, daegnuengx couh hemq “a” sing ndeu. Dai lo, nanzdauh raemx ndat lai ha? Gou sikhaek gaenjcieng lo, ganjvaiq au genfwnz bae sawq raemx ndat mbouj ndat. Yi, mbouj ndat ha! Cingq youq

mwh gou mbouj rox baenzlawz guh, daegnuengx yaepda riu’ij naeuz: “Go, gou yaeuh mwh ne! Yawj mwngz lau ndaej! Hahaha!” Lwg cabheiq neix, caen dwg hawj vunz youh hozndat youh ndeiriu.

Ndang swiq daengz byongh, daegnuengx sawqmwh got hoz gou naeuz: “Go ha, mwngz baeg luba, gou gag swiq.” Gangj le au sujbaq dumz uet raemx gwnz naj. “Caj gou majhung le, gou hix ngoenzngoengz bang mwngz swiqndang.” Daegnuengx sing’oiq gangj dwk, gij yiengh lumj gig roxsoq

nei, gou roxnyinh ndawsim raeuj-rubrub.

Lij caengz caj gou lawq gvaq-daeuj, daegnuengx sawqmwh dawz sujbaq dumz fid hwnj gwnz gyauej gou. Raemx swnh najbyak lae roengzdaej, lwgda gou deng myox lo, cij dingqnyi de riugaekgaek naeuz: “Go ha, gou gag bae daenj buh lo!”

Neix couhdwg daegnuengx gou — cabheiq youh coengmingz, gyaiez loengh gou, hoeng gou rox, de hix gig gyaiez gou.

(ngeih nienzgaep Cangh Swnghih)

